

9. 月藏經吉祥文

《月藏經》所云，聖教廣弘之實語。

我昔行苦行，為諸衆生故，捨己自身樂，令法久熾然。

我昔捨身命，為諸病人故，亦為貧衆生，令法久熾然。

我昔為菩提，捨財及妻子，寶象馬車乘，令法久熾然。

我昔供諸佛，緣覺及聲聞，父母諸師長，令法久熾然。

為聞菩提故，無量阿僧祇，備受種種苦，令法久熾然。

我修戒津儀，長夜常勤行，十方佛為證，令法久熾然。

我昔常忍辱，忍諸惡衆生，為衆除煩惱，令法久熾然。

我昔勤精進，堅固常伏他，度脫諸衆生，令法久熾然。

我修禪解脫，無色三摩提，恆沙不可數，令法久熾然。

我昔為般若，住在於閑林，演說無量論，令法久熾然。

我昔常憐愍，捨己身血肉，及捨身支節，為增正法眼。

我愍惡衆生，以慈而成熟，安置於三乘，增長正法施。

我昔智方便，度脫諸惡見，安置於正慧，法雨令不絕。

我昔以四攝，救度諸衆生，滅惡煩惱火，令四衆久住。

我昔除外道，諸惡邪見網，安置於正路，四衆得供養。

10. 迴向（法王領衆三拜）

願消三障諸煩惱

願得智慧真明了

普願罪障悉消除

世世常行菩薩道